









- Ruggieri n° 285 ne cite que  
l'édition de Paris, Denis du Pré -







LA  
RECEPTION  
DV ROY PAR L'EM-  
PEREUR MAXIMILIAN,  
& l'Archiduc Ferdinand,  
faicte à Vienne.



AVEC LES TRIOMPHES  
*faicts à l'entree du Roy Tres-  
chrestien à Venise.*



A ROVAN.

Pour Richard l'Allemand, &  
Iean Pinard, Libraires,

---

1574.

Avec Privilege du Roy.

RECEPTION

DAVID P. B. LEM.

RECEIVED MAY 18 1861

RECEIVED MAY 18 1861


RECEIVED MAY 18 1861

RECEIVED MAY 18 1861

RECEIVED MAY 18 1861

RECEIVED MAY 18 1861

RECEIVED MAY 18 1861



RECEIVED MAY 18 1861

RECEIVED MAY 18 1861

RECEIVED MAY 18 1861

RECEIVED MAY 18 1861

RECEIVED MAY 18 1861





LA  
RECEPTION DV ROY  
PAR L'EMPEREUR MAXI-  
milian, & l'Archiduc Fer-  
dinand, & les Ve-  
nitiens.



V commencement  
de ce petit discours  
il me semble bon  
remarquer, que le  
Tref-chrestien Roy  
Henry troisieme du  
nom, a veu plus de  
pays en la ieunesse  
ou il est, que tous  
ses predecesseurs Roys de Frâce. Car premie-  
rement il n'y a Prouince en ce royaume, qui  
est de grande estendüe, laquelle il n'ait veue,  
les vnes en temps de paix, les autres en temps  
de guerre. Et ne s'est trouuée en lieu, auquel

sa presence n'ait de beaucoup seruy & profité au public.

Quant aux pays estranges, vous sçauuez qu'il partit de Blamôt le troyfiesme du moys de Decembre, mil cinq cens soixante & treize: depuis lequel téps de huit moys'entiers il à trauersé l'Allemagne, où il a esté receu par les Princes, & recueillly comme sa majesté le meritoit. Laisant par tout là où il à passé, vne amitié perdurable avec les Seigneurs de l'Empire, tels que sont l'Euesque de Majence le Comte Palatin du Rhein, l'Abbé de Feulde, le Landdegraue de Hesse, Casimir gendre du Duc Auguste, le Marquis de Bradebourg, & autres.

Depuis Charlemaigne, Louys & Charles le Chaune, noz Roys, combien qu'ils ayent eu confederation à l'Empire toutesfois il ne leur est aduenu de passer le Rhein, sinon lors que Louys septiesme, pere de Philippes Auguste, allant pour le recouurement de la terre Saincte, passa par l'Allemagne avec son armee. Neantmoins les Empereurs sont venuz en France veoir noz Roys: côme Sigismond, qui vint visiter Charles le Saige à Paris: & de nostre temps Charles le quint, qui fut receu par le Roy Francoys premier, avec tous les triomphes que l'on peut veoir descritz par le Ioue, & autres historiens de ce temps.

Et pour reprendre nostre propos du Roy, sortant d'Allemaigne il entra au royaume de Pologne, qui ne luy estoit hereditaire, mais donné & acquis à la renommée de ses tres-grandes & heroiques vertuz: ou il n'est me-moire que de puis Louys, sorty de la maison d'Anjou, Prince de France y ait esté, estant ledict royaume par election deux fois aduenu à ladicte maison.

Vous auez par cy deuant ouy & leu, qu'apres les obseques du Roy Sigismond il fut couronné en sa ville de Cracouie, en la presence & du consentement des Seigneurs tant Ecclesiastiques que Seculiers dudit royaume de Pologne & grand Duché de Lituanie. Apres lequel couronnement il assista plusieurs iours entiers à l'assemblée du Senat, pour donner ordre à toutes affaires demeurees en sur-seance pendant l'interregne, affaire grandes, d'importance, & en grand nombre. Et comme sa majesté prenoit resolution de visiter les frontieres du costé des Tartares & Moscouites: & de faire paroistre tant à ses subiects, que à ses voisins amis ou ennemis, que les Polonois auoyent heureusement choisy vn Roy, pour les maintenir en temps de paix, & de guerre: suruint la nouuelle du decez du Tres-chrestien Roy Charles neufiesme, qui fut occasion à sa majesté de changer d'aduis.

Homere a escrit qu'Vlyſſes eſtant enquis ſ'il aimoit mieux retourner à ſa partie & puis mourir, ou bien eſtre immortal, & frustré à iamais de la preſence de ſes parens & amis, fit reſponſe qu'il preferoit à toute choſe le dieu de ſa naiſſance. Ainſi le Roy ſe reſſentant né pour le bien de ſa patrie, de ſes parens, & ſubiectz de ce Royaume, ſ'achemina bien toſt apres, prenant autre chemin: à fin de veoir à ſon retour pluſieurs autres Princes tant d'Allemagne que d'Italie.

Donques ſorty de Pologne, entra en la Silieſie, & en peu de iours approcha de Vienne en Autriche Maximilian Empereur, aduertý de ſa venue, enuoya au deuant de luy iuſques à trois lieues loing de Viéne ſes deux enfans: luy meſme en perſonne avec toute ſa court l'alla receuoir iuſques au bout des pontz de la Danoye qui eſt le plus gros fleuve de l'Europe.

Quatre iours entiers ſa majeſté fut en la court de l'Empereur: & au partir fut accompagné quelque téps des meſmes Seigneurs, qui luy eſtoient allez au deuant. Et a depuis par toutes les terres Imperialles eſté conduit & traicté par l'Archiduc Ferdinand, iuſques à l'entree d'Italie.

Qui eſt le pais de Friuli, appartenant à la ſeigneurie de Veniſe: où la republique enuoya quatre Ambaſſadeurs, des premiers Seigneurs



de leur cité, pour le receuoir & conduire iusques à Moran: qui est pres le bord de la mer Adriatique, auquel lieu soixante dix Senateurs le vindrent saluer. Et en attendant les preparatifs qui se dressoyent à Venise, il fit sejour l'espace de quelques iours audiect lieu de Moran.

Son entree vous sera escrete plus au long: il me suffira vous dire, que le serenissime Duc de Venise avec la seigneurie, venuz dás le Bucentaure (qui est vn vaisseau de tout temps destiné à receptions & triomphes de Roys & Princes) & encores accompagnez de douze Galeres bien armées, firent la reuerence & salutation à la majesté treschrestienne, avec les ceremonies & le respect deu à sa grandeur. Et à l'instant fut commencé par lesdictes Galeres vne espee de combat naual, trèsagreable aux spectateurs.

Cela faict sa Majesté fut amenee iusques à vn pont dressé & construiect sur la mer, sortant bien auant hors de la cité. Et puis monta au Bucentaure, & fut mené au Palais, suiuy de tous les Senateurs vestuz fort richement.

L'excellence du serenissime Duc estoit abillée de drap d'or, & par dessus sa robe vn manteau de velours cramoisy, & le chapeau Ducal du velours mesme.

Il ne seroit possible d'exprimer en parti-

culier les arcs de triomphe, l'ordre & magnificence des festins, sortes infinies d'artifices, & autres spectacles, qui furent faictz durant six iours que sa majesté y seiourna.

De iour les Ambassadeurs & grâds seigneurs par maniere de recreation & de passe-temps, se faisoient pourmener deçà delà par la ville, dedans Gondoles & batteaux. Ce qui a de coustume de se faire en telles solennitez aux despens de la republique & Seigneurie. Ces Gondoles, en nombre infini, estoient peintes, ornees & tapissées fort superbement: auxquelles on voyoit attachees les armoiries de chaque Prince & Seigneur, qui estoit dedans. Tout estoit remply de ioye & liesse, laquelle estoit encores augmentee par les Musiciens & ioueurs de toutes façons d'instrumentz. On voyoit à s'aise des fenestres des maisons vne bonne partie des triumphes & magnificence de ceste feste.

La nuit estant venue ils donnoient à cognoistre ceste resiouissance publique & solemnelle par vn tintamarre de canons, & par feux allumez & corches posees au haut des tours des temples, & au fais des plus grâds edifices. Et on ne sauroit croire quel appareil de banquetz & festins il se faisoit.

Les rues estoient parees de riche tapissierie, depuis la maison de ville iusques au bout  
du mar-



du marché de saint Marc. Brief ceste illustissime seigneurie nelaissa rien en arriere, dont elle se peut aduifer, qui deust seruir à decorer ceste venue, & declarer à tout le monde leur ioye & allegresse.

Il partit de Venise le Lundy vingt sixiesme iour de Iuillet, prenant le chemin de Ferrare, prié par le Duc, qui estoit venu expres à Venise, de luy faire tant d'honneur, que de vouloir passer par ses terres. Et le mesme iour qu'il partit de Venise le Roy depescha Liancourt, l'un de ses Gentils-hommes pour aduertir la Royne sa mere, tant des honneurs que lon luy auoit faiçts à Venise que de son departement.

Sont allez le saluër le Seigneur de Malicorne, suiuy de plusieurs Gentils-hommes: & depuis mōsieur le grand Prieur: le sieur de Cheuery Conseiller au conseil priué: le sieur de Lanfac: le sieur de Chemeraut: le Baron de Sanfac: les sieurs de Villeroy & de Sauues

Secretaires d'estat: les Officiers de  
sa maison, & infiniz  
autres.

B



LES  
TRIOMPHES DE L'EN-  
tree du Roy Tres-chrestien  
à Venise.



Vis que lon attend  
icy à Venise le Tres-  
chrestien Roy de  
France, avec l'occa-  
sion qui se presente,  
m'a sèblé bon vous  
aduertir des prepa-  
ratifs qu'on fait  
pour receuoir vn si

grand Roy.

Il partit de Vienne par le Friuli, qui est vn  
païs subiect à la tres-illustre Seigneurie de  
Venise, & s'en vient à Treuis. La Seigneurie  
par tout le chemin luy a enuoyé gens pour  
faire prouision de viures, pour luy & toute  
sa suite, aux despens du public. Elle luy a en-  
uoyé aussi au deuât quatre Ambassadeurs des  
premiers Gentils hommes de toute la Repu-  
blique, avec deux cens cheuaux, & cent co-

ches: & ordonné cinq cens hommes d'armes pour sa garde. Les Ambassadeurs sont allez en grande magnificence, & la cauallerie en tresbon ordre.

De Treuis, ils'en vient droit au bord de la mer à vn lieu appelé Machecala: où la Seigneurie mande pour le recenoir 70. Gentils hommes Senateurs en leurs habitz, dans 70. barques, que nous appellons Gondoles, couuertes de draps de foye, chacune seló sa liuree de diuers couleurs.

Suiuront apres vn grand nombre de vaisseaux appelez Brigantins: où seront cét ieunes Gentils hommes Venitiens, chacun avec quatre Pages: & les nauires à despenſe publique seront ornees le plus pompeusement que la Noblesse à peu penser.

Le Roy sera en vne Gondole, toute peinte & doree, couuerte de toille d'or & les matelots habillez de mesme.

De là il sera mené pour disner à Muran, où est appresté vn Palais fort superbe, & vn sumptueux banquet.

Ayant disné apres mille passe-temps il sera conduict par la mesme compagnie iusques au riuage viz à viz de Venise: assauoir aux deux Chasteaux ou sont deux bien belles fortresses. Là viendra l'illustrissime Seigneurie, & le Duc serenissime, en la nauire que nous ap-

pellons Bucentaure, doree de nouueau, & richement couuerte de velours cramoisy, frangée & bordée de fil d'or, accompagnée de trois cens Bringantins, qui ont esté faicts par commandement de la Seigneurie, par les artisans & batteliers de ceste ville. Et onze Galeres les plus belles del'arsenal, bien armées de soldats : desquels sera chef l'illustrissime Seigneur Prouiseur de la mer Adriatique.

Lequel (quand on descouurira sa Maiesté) avec tout ce grand nombre de vaisseaux s'en ira pour le rencontrer, en bataille rengeée, cōmes'il vouloit cōbatre son ennemi : & l'ayāt salué de mille canonnades, le priera monter dans la Capitanie, & le conduira viz à viz du riuage: ou est dressé vn arc triomphal admirable, auquel sont peintes au vif toutes les entreprises de sa maiesté.

Tout apres de l'arc est vne Galere merueilleuse, au milieu de laquelle sera le serinissime Duc & l'illustrissime Seigneurie : laquelle voyant approcher sa maiesté luy ira au deuant à pied, sus vn pont faict avec grand artifice, qui entre demie lieuë dans la mer.

Sa maiesté descendra de la Galere, & sera accompagnée du serinissime Duc en ladicte Galere. Et apres auoir chanté Te Deum, on le suppliera monter au Bucentaure, & avec grande pompe on le conduira à Venise, au

Palais préparé pour sa maiesté.

Ie ne feray mención du bruit de l'artillerie, & son de cloches qu'on entendra. Il me suffit de vous dire que ló a ordonné à toutes les rencótres de faire grand feste : & quand sa maiesté descendra, se presenteront 50. ieunes Gentils hommes Venitiens habillez royalement, destinez au seruice du Roy, lesquels tousiours assisteront à sa maiesté. On a préparé 25. Gondoles couuerts de drap de soye Turquine, parsemé de fleurs de lys d'or, & les matelots habillez de mesme : pour le seruice de la Court, pour aller veoir la ville priuément, ou pour autre passe-temps.

Les Seigneurs ont aussi ordonné que toutes maison qui sont sur le grand canal, tiennent à chaque fenestre des flambeaux ardens, pour esclairer toute la ville.

Aux quatre heures l'on représentera des choses admirables, entre lesquelles on faict vne grande montagne, laquelle avec contrepoix se tiendra au fond de l'eau & à temps ordonné se monstrera dehors. Et sortiront d'icelle choses dignes d'estre venüs d'un si grand Roy.

Au grand conseil se fera vne feste, où serót quatre cent Damoiselles des plus belles de la ville, habillees toutes de blanc & chargees de richesses royales : En ceste feste deux mille ieunes enfans porteront la collation conue-



nable à vne si grande solemnité . Et seront équippez tous d'une mesme couleur qui sera chose belle à voir . Car ils tiendront vne demie lieuë de chemin , estant ladicte collation preparee à vn bout de la ville pour la faire porter au Palais.

Lon fera aussi d'autres spectacles , ainsi que les Seigneurs se pourront aduiser. Car outre ce qui a esté ordonné du Senat , y en y aura d'autres qui seront faicts par des Gentils-hômes particuliers. La seigneurie despandra en ceste feste cent mille escuz.

Lon dit que le Roy viendra en France tout droit par le pays de ces seigneurs: & par tout luy seront defrayez ses despens & à ceux de toute sa Court. Et sera par tout accompagné de la gendarmerie ordinaire de la Seigneurie de Venise, tant à pied qu'à cheual.

Lon dit aussi qu'il prendra le chemin de Ferrare, n'estant pour autre chose icy arriué, l'excellentissime Duc de Ferrare: lequel aujourdhuy est party pour aller au deuant, mais on ne scait pas au vray particulierement la volonté de sa majesté.

Tout plein de Princes & Ambassadeurs arriuent icy tous les iours, tellement que lon ne se peut tourner dans la ville, laquelle est toute remplie de ioye & allegresse.





*Briefue description de la cité de  
Vienne.*

**V**ienne cité Metropolitaine tres-renommee en l'Archiduché d'Autriche (qui a esté autrefois appelée Pannonie la haute) deuant la Natiuité de nostre Seigneur Ies<sup>us</sup> Christ fut habitee par les Sarmates ou Polonois: apres lesquels aucuns peuples de la Gaule, qui est la France, se desbanderent: sçauoir est ceux de Borbonnois, de Sens & autres quartiers, & vindrent en Autriche: & peu à peu crurent & se multiplierent en telle sorte, estans distinguez par noms & par bandes qu'ils dechasserent les Sarmates de leur place, & demeurèrent maistres de ceste cité, avec les villes & prouinces circonuoisines.

Charlemagne Roy de Frâce en l'an 800. restitua les limites du Rhein, qui auoyent esté renommez entre les Romains, & restaura en iceux la religion qui y auoit esté abbatue, & bailla ces prouinces pour la plus grand part aux nations Teutoniques, pour y habiter, a-

pres en auoir chassé les Auares, qui gastoyent le pais. Il bastit à Vienne vne eglise, qu'il dedia à saint Pierre prince des Apostres, laquelle y est encores auourd'huy toute ruineuse, à cause de son ancienneté. Il en fit autant aux champs circonuoisins, & sur le riuage de la Dunoye, ou il edifia plusieurs lieux & temples pour entretenir la religion Chrestienne: lesquelles la viellesse a changees, les vns en de fors petits villages, les autres en des monasteres.

De ce temps les Comtes de Blaye changerent de pais, & vindrent des Gaules, & par la grace des Roys de France obtindrent plusieurs terres en Noric & Pannonie ou ils bastirent plusieurs chasteaux & monasteres. Or combien que le sang & lignage de Blaye soit demouré par longue espace de temps en Autriche, toutesfois elle a perdu ses heritages & possessions, lesquelles ont esté occupees, par les Hongres, aussi bien que Vienne. Car ils se retirerent outre la Dunoye ou ils bastirent encores plusieurs belles places. La famille de ceux cy enuiron l'an de nostre Sauueur 1264. en Conrad & Oton, lesquels furent occis en guerre par les Hongres: lesquels depuis furent chassés non seulement du lieu de Vienne, mais de toute la haute Pannonie & du Noric de Ripe, par Leopold & Albert

Compte

Compte de Babenberg, auxquels la marque Orientale auoit esté donnée en fief par Oto deuxiesme. Par ceux-cy la ville fut mieux close & agrandie. On voit encores les murailles anciennes abbatues en partie par Matthieu Roy des Hongres, & en partie par le Turc Soliman.

Quand la lignee de Babenberg est defaillie, elle a esté receuë en la protectiõ de Raoul d'Haspurg, l'an 1280. lors qu'il fut fait Empereur. Elle eut à ceste heure là de grands priuileges, & fut tellement alors augmentee de maisons & edifices publiques, que la tierce partie qui y fut adionstee, passoit en grandeur les deux autres.

L'an 1298. Albert fils de Raoul esleu Roy des Romains & couronné à Aix la chappelle par les Princes electeurs, donna la gouuernement de la duché d'Austriche à son filz Raoul qui eut en mariage la sœur de Philippes Roy de France. Lesquels remeirent l'Eglise Cathedrale en Vienne : l'Vniuersité y fut aussi restablie en mesme temps. Ils y edifierent vne paroisse, dediee à Saint Michel, & redresserent le conuent des Carmes sur les ruines de la vieille court. Aussi se trouue par la fondation que l'Abbaye sainte Claire fut edifiee par ce Raoul Duc d'Austriche & par Blanche sa femme, sœur du Roy de France.

C

Par elle mesme le conuent des freres Mineurs fut basti.

L'an 1359. Ferdinand Duc d'Austriche, esleu Roy de Hongrie, recouura plusieurs places que les Turcs auoyent prinſes & meit en fuitte Iean Vaiuoda son ennemy, lequel pre-tendoit que le royaume luy appartenoit. Luy se voyant ainſi vaincu & chasſe se retira au Turc, lequel employa toutes ſes forces pour ſouſtenir ceſte querelle. Parquoy retourna en Hongrie avec groſſe armee, & print d'ere- cheſ par force toutes les places que Ferdinand auoit reconuees. Il donna onze aſſaux contre le chaſteau de Bude, & ne le peut prendre iuſques à ce qu'ils fuſſent affamez. Et lors ilz furent contrainctz de ſe rendre, leſquelz toutesfois paſſerent quaſi tous par le trenchant de l'eſpee. Apres qu'il eut pris Bude il ſe ietta ſur le pais d'Austriche, foudroyent tout par violence, & commettant beaucoup de cruau- tez contre les Chreſtiens. Il faiſoit creuer aux vns les yeux, couper les mains aux autres les aureilles & le nez, arracher les genitoires aux enfans, violer les vierges, couper les mam- melles aux femmes, fendre leur ventre & mettre le fruiſt dedans le feu. Apres il vint mettre le ſiege deuant Vienne, le vingtſixieſ- me iour de Septembre. Le bruit eſt qu'il auoit deux cens cinquante mille homes en armes.



Au commencement du siege le Turc renuoya quelques prisonniers, pour annoncer à leurs gens que l'ennemy estoit venu avec terrible appareil de guerre & en grande force. Et que s'ils se vouloyent rendre, il ne leur feroit aucune violence : & au contraire qu'il mettroit tout à feu & à sang, s'ils luy vouloyent resister. Quand il se voit mesprisé, il frémist à l'encontre de la cité, de laquelle il canonna fort la muraille, tellement qu'il feit breche, & enuoya ses gens à l'assaut ou il feit grand perte.

Ils en donnerent encores vn autre le treziesme iour d'Octobre, auquel il tuerét grand nombre de Turcs. Au troisieme assaut ils en firent autant. Et au dernier il y eut tant de sang espendu, & fut faite vne telle boucherie des Turcs, que ceux qui auoient esté à l'assaut, contrainctz de se retirer pour l'aspre defense que faisoient les nostres, n'y vouloyent point retourner, pour menasse qu'on leur feist, Ils donnerent l'assaut à la muraille par vingt fois & furent par autant de fois repoussez par la vertu de Dieu & la fidele defense du Prince Philippes, Comte Palatin & autres qui estoient dedans. Apres que le Turc se fut efforcé par plusieurs & diuers moyens de prendre ceste ville & que tous ses efforts ne luy seruoient de rien, il perdit toute esperance, & leua le siege le cinquiesme iour d'Octobre,

ayant perdu en iceluy soixante mille homes  
& plus.

L'an 1531. le Roy Ferdinand estant à Aix, apres qu'il eut esté couronné Roy, le Turc pensant auoir bonne occasion d'affliger la Chrestienté sans faire grand effort, retourna en Hongrie, & voulut encores vne fois essayer s'il pourroit prendre Vienne, mais Charles & Ferdinand freres y donnerent si bon ordre, que escriuirent à leurs gens qu'ils prinset garde, que la Chrestienté ne fust endommagée. Les Capitaines assemblerent leurs camps, & se mirent en bataille contre l'ennemy. Ce fut vn heureux combat, auquel la plus grâde partie des Turcs fut tuee ou prinse.

Nonobstant tous ces damages Vienne a esté tousiours garantie, eleuee & annoblie par Erideric quatriesme & par son fils Maximilian, & par Ferdinand Auguste & Maximilian son fils, Empereur trespuissant & tres-victorieux: de façon que c'est auioird'huy la commune retraicte de six principales langues, & des marchands qui en vsent: à sçauoir Alemans, Italiens, Hongres, Boëmiens, Polonois & Sclauons.

D'auantage y a en la ville douze Magistratz, qui iugent tous les iours & prononcent du droict. Tous les quatres sont ecclesiastiques: à sçauoir l'Official de l'Euesque de Pataue,



l'Official de l'Euesque de Vienne, le Chapitre del'Eglise catedrale, le Recteur de l'Vniuersité. Item quatre Iuges dedans la ville & quatre dehors, dont les principaux sont ceux qu'on appelle Regiments, dont les paiys de la basse Autriche viennent requerir le droict: & puis ce que lon appelle le fisque ou la chambre: là ou lon raporte tous les comptes desdictes Prouinces. Les autres sont subiectes à ceux-cy & en appelle lon de leurs sentences aux Iuges superieurs. Le Senat de la prouince avec ses Marechaux. Les Ordónez de la prouince. Le Senat de la ville avec le conseil: le Pretoire de la ville: le iugement du peage, le Consistoire des marchands, qu'ils appellent Handgrauiat.

Voila ce que nous auons voulu remarquer de la cité de Vienne Capitale & residance des tres-illustres Princes & Archiducs d'Autriche, Stirie, Carinthie, Croatie: pour monstrier qu'il n'y a region, ou noz ancestres les Gaulois & apres eux les François n'ayent laissé vestiges tres-manifestes de leur prouesses & vertus.

FIN.

EXTRACT  
du Priuilege.

*Il est permis à Richard l'Allemand,  
& Jean Pinard, libraires en ceste ville  
de Rouë, d'Imprimer ou faire Imprimer,  
vendre & distribuer, La reception  
du Roy, par l'Empereur Maximi-  
lian, & l'Archiduc Ferdinand, fai-  
cte à Vienne. Et deffences à tous au-  
tres Imprimeurs & libraires, de n'en  
Imprimer ny faire Imprimer, vendre ne  
distribuer, sur peine de confiscation &  
d'amende arbitraire. Donné à Rouen le  
neufiesme iour d'Aoust. 1574.*

Signé DE BREVEDENT,


















SPECIAL 86-B  
2439

GETTY CENTER LIBRARY

